

Профилактика - гиёхвандликка қарши таъсирчан усул.

Мамлакатимизда наркотик моддаларнинг ноқонуний айланишига қарши курашиш бўйича самарали тизим шаклланган. Инсон ҳаётига хавф солувчи, турли жиноятларга йўл очувчи гиёхвандликка қарши курашиш тобора долзарб аҳамият касб этмоқда.

Бутун мамлакатимиз бўйлаб 1 майдан 30 июнь кунига қадар ўтказилган “Қорадори – 2018” тадбири ҳам гиёхвандлик воситалари ва психотроп моддаларнинг ноқонуний айланишига қарши курашишда муҳим жараёнга айланди.

Вилоятда ушбу тадбир юзасидан олиб борилаётган чора-тадбирлар тафсилоти хусусида вилоят ИИБ матбуот хизмати мутахассиси, сержант Шокиржон Бекназаров маълумот берди.

-Ўзбекистон Республикаси Ички ишлар вазирлиги, унинг жойлардаги бошқармалари томонидан тадбир доирасида наркотрафик ва наркотик моддаларнинг ғайриқонуний айланишига қарши курашиш, наркотик моддаларнинг мамлакатимизга контрабанда йўли билан кириб келиши ва транзитининг олдини олишга эътибор қаратилмоқда. Вилоятимизда ҳам ҳуқуқни муҳофаза қилувчи идоралар ҳамкорлигига бу оғатга қарши изчил кураш олиб борилаётгани ўз самарасини бермоқда.

Тадбир мобайнида Фарғона шаҳар, Қиргули мавзесида ҳаракатланиб келаётган фуқаро бошқарувидаги “Матиз” русумли 40 О131JA давлат белгили автомашина ҳолислар иштироқида кўздан кечирилганда, ҳайдовчи ўриндиғи остида селофан пакетга солинган 1 килограмм 803 грамм гашиш гиёхванд моддаси борлиги аниқланган. Қинғир йўлни ихтиёр этган фуқаро бу билан чекланмаган экан. Гумонланувчининг яшаш хонадони кўздан кечирилганда шиша банка, селофан пакетлар ҳамда картон қоғозларга ўралган жами 2 килограмм 719 грамм марихуана, 35 грамм гашиш гиёхванд моддалар сақланаётгани, шунингдек, томорқасида 3 туп наша ҳамда 13 туп кўкнор гиёхванд ўсимликлари парваришланаётгани аниқланган. Айни вақтда мазкур ҳолат юзасидан тергов ҳаракатлари олиб борилмоқда.

Шунга ўхшаш ҳолат Ўзбекистон туманида ҳам қайд этилди. Вилоят ички ишлар бошқармаси Транспортда жамоат хавфсизлигини таъминлаш бўлими ҳодимлари томонидан катта миқдордаги гиёхвандлик моддаларини етиштираётган шахс қўлга олинди. Яйпан шаҳарчасида истиқомат қилувчи фуқаро Ғозиев ўз хонадонидаги экин майдонида 97 туп миқдорда кўкнори гиёхвандлик моддасини парваришлаб келган. Фуқаро далилий ашё билан қўлга олинди. Ҳозирда Ғозиевга нисбатан жиноят иши қўзғатилиб дастлабки тергов ҳаракатлари олиб борилмоқда.

Гиёхвандликка чалинган кимсалар оиласининг тинчи бузилаётгани, фарзандларининг қаровсиз қолаётгани, ўзлари эса саломатлигини йўқотиб, бевақт ўлим топаётгани ҳеч кимга сир эмас. Гиёхвандликка қарши курашиш, уларнинг заарарли оқибатларидан кенг жамоатчиликни хабардор қилиш, тарғибот-ташвиқот ишларини олиб бориш фаолиятимизнинг доимий ва муҳим йўналишига айланиши зарур.

Мадаминжон СОЛИЖНОВ сұхбатлашди.

2018-06-05 13:20:47